

आकाशवाणी

खास-खास खबरां:-

- चुनां आयोग नै पच्छम बंगाल च मतदाता सूचियें दी नमें सिरेया तफसीली नजरसानी आहली प्रक्रिया SIR सरबंधि सुप्रीम कोर्ट दे हुकम गी लागू करने दे निर्देश जारी कीते न।
- अमरीकी राष्ट्रपति डोनाल्ड ट्रम्प होरें आखेया ऐ जे ग्रीनलैंड पर कब्जा हासल करने लेई ओ ताकत दा इस्तमाल नैई करगंन पर आर्कटिक टॉपू दी मिलकियत दी अमरीका दी मंग बरकरार ऐ।
- यूरोपीय संसद नै राष्ट्रपति ट्रम्प हुंदी ग्रीनलैंड गी लेइयें मंग दे बाद ओहदे कन्नै यूरोपी संघ बपार सौदें गी मुअतल करी दिता ऐ।
- ICC नै बंगलादेश दी ओदे मैच भारत थमां बाहर खडाने दी मंग गी खारज करी दिता ऐ ते आखेया ऐ जे मैच तय कार्जक्रम मताबक भारत च गै कराए जागंन।
- ते न्यूजीलैंड कन्नै 5 टी-0 मैचें दी श्रृंखला दे पैहले मकाबले च भारत नै मेहमान टीम गी 48 रन्ज कन्नै रहाई दिता ऐ।

<><><><><><>

EC-SC Order

चुनां आयोग नै पच्छम बंगाल च मतदाता सूचियें दी नमें सिरेया तफसीली नजरसानी आहली प्रक्रिया SIR सरबंधि सुप्रीम कोर्ट दे हुकम गी लागू करने दे निर्देश जारी कीते न। इंदे च मतदाता सूचियें च कमियें-खामियें ते गलतियें गी गैर निर्धारत श्रेणियें तैहत नाएं गी सार्वजनिक रुपै च प्रदर्शत करना लाजमी ऐ ते प्रभावत मतदाताएं गी तय समें-सीमा दे अंदर-अंदर दस्तावेज जमा करने ते सुनवाई दा मौका दिता गेदा ऐ।

<><><><><><>

Trump- Putin Greenland

अमरीका दे राष्ट्रपति डोनाल्ड ट्रम्प होरें आखेया ऐ जे ओ ग्रीनलैंड पर कब्जा हासल करने लेई ओ ताकत दा इस्तमाल नैई करगंन- पर कन्नै गै आर्कटिक टापू पर अमरीका गी मिलकियत दिते जाने दी अपनी मंग गी दोहराया ऐ। दावोस च विश्व आर्थिक मंच गी सम्बोधत करदे होई ट्रम्प होरें आखेया जे ओ ग्रीनलैंड गी हासल करने लेई चर्चा कराने गितें गल्लबात तौले शुरु कराना चाहंदे न। ग्रीनलैंड डेनमार्क दा इक ऐसा हिस्सा ऐ जेहड़ा अद्दे-दुब्बे तौरा पर खुदमुख्तयार ऐ ते डेनमार्क अमरीका दा सहयोगी मुख्य ऐ। अमरीका ते डेनमार्क उनें 32 उतरी अमरीका ते यूरोपी देशें च शामिल ऐ- जेहडे नाटो नां दा इक सैन्य संगठन बनांदे न। तौआई ग्रीनलैंड दा आक्खना ऐ जे ओ अमरीका दा हिस्सा नैई बनना चाहंदा- जेहदा इस टॉपू नुमा मुख्यै च पैहले गै इक फौजी ठकाना ऐ। ट्रम्प हुंदे इस ताजा ब्यान दे बाद डेनमार्क च तनाऽ बधी गेदा ऐ ते नाटो दी इकजुटता बी डगमंगा दी नजरी आवा करदी ऐ। इस्सै दौरान रूस दे राष्ट्रपति ब्लादिमीर पुतिन होरें आखेया ऐ जे उनेंगी इस मुद्दे गी लेइयै कोई चिंता नैई ऐ। पुतिन होरें कल रातीं राष्ट्रपति सुरक्षा परिषद दी बैठका च टेलीवीजन पर प्रसारत अपने सम्बोधन च आखेया ऐ जे ग्रीनलैंड च केह हुंदा ऐ- एहदे नै स्हाड़ा किश लैना देना नैई ऐ।

<><><><><><>

EU-US Trade Deal

यूरोपी संसद नै अमरीका दे राष्ट्रपति डोनाल्ड ट्रम्प आसेया ग्रीनलैंड गी अपने कन्नै रलाने दी मंग ते उंदे इस प्रस्ताऽ दा विरोध करने आले यूरोपी सहयोगियें पर टैरिफ लाने दी धमकी दे विरोध च अमरीका दे कन्नै यूरोपी संघ दे मुक्त बपार समझौते गी स्थगित करने दा फैसला लैता ऐ। यूरोपी संघ दी संसद नै अमरीका थमां आयात कीते जाने आले समेयानें पर लग्गने आले आयात शूल्क हटाने कन्नै जुड़े दे विधायी प्रस्तावें पर बैहस दे दौरान ए फैसला लैता। ए प्रस्ताव जुलाई दे अखीरै च स्कॉटलैंड दे टर्नबैरी च होए दे समझौते दा इक अहम हिस्सा न। एदे इलावा अमरीका लाब्सटर पर सिफर शुल्क गी जारी रखने दा बी प्रस्ताव ऐ जेदे पर पैहली बारी बरे 2020 च ट्रम्प प्रशासन दौरान सहमति बनी ही।

केंई सांसदें शिकायत कीती ऐ जे अमरीका कन्नै कीता गेदा बपार समझौता एक तरफा ऐ कीजे एदे च यूरोपी संघ गी गै मते सारे आयात शुल्क घटाने हुंदे न। जिस्सलै के अमरीका 15 फिसद दे साहबे शुल्क दर गी बरकरार रक्खदा ऐ।

<><><><><><>

India -AI

भारत नै जोर देइयै आखेया ऐ जे देश विश्व सतह दियें आर्टिफीशल इंटेलीजेन्स दियें सेवाएं लेई इक निग्गर मुंड पा करदा ऐ। कल दावोस च विश्व आर्थिक फोरम गी सम्बोधित करदे होई इलैक्ट्रॉनिक्स ते सूचना प्राद्योगिकी मंत्री अश्विनी वैष्णव होरें आखेया जे भारत एल्लै 5 सतहें पर इत भेठा कम्म करा रदा ऐ जिन्दे च AI Architecture, Application, Model Chip ते Infra and Energy क्षेत्र शामिल न।

<><><><><><>

India -Turkmenistan

विदेश मंत्रालय दे सचिव सिबी जॉर्ज होरें अशगाबात मंत्री तुर्क मेनिस्तान दे विदेश मंत्री राशिद मेरेदोव हुंदे नै मलाटी कीती। विदेशमंत्रालय नै इक सोशल मीडिया पोस्ट पर दस्सेया ऐ जे इनें चर्चाएं पर दपक्खी सरबंधें दे बक्ख-बक्ख पैहलुएं दे कन्नो-कन्नी आपसी हित दे क्षेत्रीय ते कुलसंसारी मुद्दें पर विचारबटांदरता कीता गया।

<><><><><><>

ICC -BCB

राष्ट्रीय क्रिकेट काउंटिल ICC नै बंगलादेश क्रिकेट बोर्ड दी उस गुजारिश गी मनने थमां नां करी दिती ऐ जेदे च उनें अँदे ICC टी-20 विश्व कप दौरान बंगलादेश दे मैचें गी श्रीलंका च करोआने दी मंग कीती ही। ICC नै आखेया ऐ जे विश्व कप दे मैच अपने तय कार्यक्रम दे साहबै गै होगन। जारी इक ब्यान च ICC नै इब्बी आखेया ऐ जे भारत च इस प्रतियोगिता दे कुसै बी थाहरै पर बंगलादेश दे खडारियें, अधिकारियें जां प्रशकें दी सुरक्षा गी कोई खतरा नैई ऐ।

ए फैसला वीडियो कांफ्रेंस दे माध्यम कन्नै आयोजित ICC बोर्ड दी बैठका च लैता गया, जेड़ी बंगलादेश क्रिकेट बोर्ड आसेया चेंता जताने ते आयोजन आली थाहरें च बदलाव आली मंग दे बाद स्थिति पर चर्चा लेई सददी गेदी ही। ICC बोर्ड नै आखेया ऐ जे मौजूदा हालात च मैचें गी नमीं थाहरें पर करोआना ICC आयोजनें दी गरीमा गी प्रभावित करी सकदा ऐ। ICC मुजब बोर्ड नै स्वतंत्र मूल्यांकन सने केई सुरक्षा समीक्षां कीतियां न, जिन्दा ए नतीजा निकलेया ऐ जे बंगलादेश दे खडारियें गी कोई खतरा नैई ऐ। ध्यानजोग ऐ जे विश्व कप च बंगलादेश गी अपनी भागीदारी दी तस्दीक करने लेई 21 जनवरी तगर दा समें दिता गेदा हा। ICC बोर्ड नै उनेंगी अपना पक्ख रखने आस्तै इक होर ध्याड़े दा समें दिता ऐ। इस गल्लै दै असार नै जेकर बंगलादेश इस प्रतियोगिता शा बाहर होने दा फैसला करदा ऐ तां मौजूदा दर्जेबंदी दे मताबक स्कॉटलैंड ओदी थाहरा पर ए प्रतियोगिता खेड्डी सकदा ऐ।

<><><><><><>

Cricket

भारत नै कल नागपुर च 5 टी-20 मैचें दी श्रृंखला दे पैहले मकाबले च न्यूजीलैंड गी 48 रन्ज कन्नै रहाई दिता। इस जित दे कन्नै गै भारत नै श्रृंखला च 1-0 दी बढ़त बनाई लैती ऐ। विदर्भ क्रिकेट स्टेडियम च खेड्डे गेदे मकाबले च भारत दे 239 रन्ज दे लक्ष दे परते च न्यूजीलैंड दी पूरी टीम 20एं च 7 विकटां मोहाइयै छड़े 190 रन्ज गै बनाई सकी। महमानटीम लेई ग्लेन फिलिप्स नै सब्भनें शा मते 78 रन्ज बनाए। भारत दी तरफा वरुण चक्रवती ते शिवम दूबे नै दंऊ-दंऊ विकटां लैतियां- जिसलै जे अर्शदीप सिंह- हार्दिक पांडेया ते अक्षर पटेल नै मेहमान टीम दा इक- इक खडारी आउट कीता। एहदे शा पैहले न्यूजीलैंड नै टॉस जितियै पैहले गेंदबाजी करने दा फैसला लैता- जेहदे पर भारत नै निर्धारत 20एं ओवरें च 238 रन्ज बनाए। शानदार 84 रन्ज दी पारी खेडने आहले सलामी बल्लेबाज अभिषेक शर्मा गी “प्लेयर ऑफ द मैच” घोषत कीता गया।

<><><><><><>

Badminton

इंडोनेशिया मास्टर्स बैडमिंटन टूर्नामेंट च अज्ज राउंड ऑफ सिक्सटीन मकाबले खेड्डे जागंन। मर्दे दे इक्कले-इक्कले मकाबले च लक्ष्य सेन ते हांगकांग दे जेसन गुनावन आमने-सामने होगंन= जिसले कि किदांबी श्रीकांत दा मकाबला चीनी ताइपे दे चाऊ टिएन चेन कन्नै होग। तौआई महिलायें दे इक्कले-इक्कले मकाबले च पी.वी. सिंधु दा मकाबला डेनमार्क दी लाइन कजर्सफेल्ड कन्नै होग। मर्दे दे डबल्स मकाबले च भारतीय जोड़ी अर्जुन मदाथिल राचन्द्रन ते हरिहरन अमसक अरुणन दा सामना मलेशिया दी जोड़ी टी काई वुन ते मैन वेई चोंग कन्नै होग।

<><><><><><>

Nepal Election

भारत नै नेपाल गी चुना सरबंधि सहायता दी पैहली किशत कल सोपी दिती ऐ। काठमांडू स्थित भारती दूतावार च एह सहायता नेपाल सरकार दी गुजारश पर उत्थू दे गृहमंत्री ओम प्रकाश आर्याल होरें गी सौंपी। एहदे च 61 डबल कैब पिकअप गड्डी ते होर समग्री शामिल ऐ।

<><><><><><>

Beating Retreat Restriction

दिल्ली ट्रैफिक पुलिस जानकारी दिती ऐ जे अज्ज विजय चौक पर होने आहली बीटिंग रिट्रीट समारोह दी रिहर्सल दे कारण नमी दिल्ली दे किश हिस्से च गड्डियें दी आओ-जाई पर पाबंदी रौहग। विजय चौक शामी 4 बजे कोला लेइयै साड्डे 6 बजे तोड़ी गड्डियें दी आओ-जाई लेई बंद रौहग। कृषि भवन थमां विजय चौक बक्खी रायसीना रोड पर बी गड्डियें दी आओ-जाई पर रोक रौहग। रिहर्सल दौरान दारा शिकोह रोड, कृष्णा मेनन मार्ग ते सुनेहरी मसीत कोला अगगे विजय चौक बक्खी कुसे बी गड्डी गी जाने दी इजाजत नैई होग। इस रस्तेया लंघने आहली गड्डियें गी सलाह दिती गई ऐ जे ओ रानी झांसी रोड ते निटो रोड जनेए मतवादत रस्ते दा इस्तमाल करन।

<><><><><><>